

Universitäts- und Landesbibliothek Tirol

Franz Schweyger's Chronik der Stadt Hall

Schweyger, Franz Innsbruck, 1867

Kitzpüchl

urn:nbn:at:at-ubi:2-12832

Spännier durchzug.

Am 19. und 20. Julii send durch Hall grittn 300 Spänier, 1546 all mit langen haggnpuxen, der claussn Ernburg zu hilff, nachmals den 21. Julii widerumb durch Hall, der kays. majestät auff Regenspurg zue erfordert.

Haimerlaubung der von Hall.

Am 20. Julii hat der öbrist hauptman Francischg von Kastlalt erlaubt durch fürpett etlichen burgern von Hall haim zu ziehen, hat aber pey im behalten 100 man, von Innsprugg 50 man. Die von Hall seind am 21. Julii zu abent anhaims khumen.

Es ist auch der merer tail der perkwerksleith von Schwatz widerumb anhaims khumen.

Kriegszug von Zierl der clausn zue.

Am 21. Julii ist der obrist hauptman Francisch von Castlalt mit seinem kriegsvolk mit sambt unsern 100 purgern von Hall, so er vormals pey im hat phalten, vom thiergarttn und Zirl gen Telffs verruckt, auch mit dem grossen gschitz der claussn zue.

Kitzpüchl.

Am 21. Julii zu abent zwischn 6 und 7 ur seind zu Hall ankhumen das gricht und stat Kitzbüchl, 500 man guet, habn ain fannen ghabt, rott und grien, seind übernacht zue Hall pliben.

Ankunft der von Hall hundert mann.

Am 27. Julii seind unsere purger all, die 100 man mit aufgereckten fannen zue abent widerumb anhaims gen Hall khumen, aus vergünstigung des öbristn haubtman Francisch von Castlalt und der kgl. regierung, ursach der durchzig des wälschen und hispanischen kriegsvolks halbn durch Tyrol. Es ist auch vergunt worden dem landtgricht Stertzing und perkwerch mit sambt Matrai und Stainach, Sunnenburg, Rettnberg, Thaur, Rottnholtz, Rattnberg. Aber die ober gricht im Inntall mit sambt dem gricht Khitzpüchl haben muessn pleiben peym öbristn zu Telffs.

Wälsch Pöckhen.

Am 29. Julii seind 100 und pei 60 wälsch pockhen aus Maylandt mit sambt einem herrn zu Hall am Innstram hinab gfaren gen Wasserburg, volgents auff Regnspurg der kayserlichen majestät zue.